

Welatê Fransayê ku niha serokê doreyî ê Yekîtiya Ewropayê ye, serbarê gazîkirina balyozê Îranê li Parisê, nîgeraniya xwe ji xirabbûna mafê mirovan li Îranê diyar kir. Fransayê nîgeraniya xwe derheq hebûna ferq û cudahiyan olî û netewî, kiryarên dezgehên dadwerî li dijî çalakên jinan, pêkanîna zext û givaşan bo ser xwendekaran, biçavkirina çalakên karkerî û îdamkirina tawanbarên jêr temenê 18 saliyê, diyar kir.

# CEZAYÊ ÎDAMÊ DÎ 137 WELATÊN CÎHANÊ DE HATE RAKIRIN

► Hevdem tevî roja 10'ê Çiriya Pêşîn a 2008'an, Roja Cîhanî ya Xebat li Dijî Îdamê, Rêxistina Neteweyên Yekbûyî daxuyaniyeke çapemeniyê weşand û ragihand ku 137 welatên cîhanê cezayê îdamê rakirine.

Eva di halekê de ye ku hêj 60 welat vê cezayê di qanûnên xwe de diparêzin û dimeşînin.

Efûya Navneteweyî jî di vê derbarê de raporek weşand û eşkere kir ku di sala borî de, piraniya daliqandinên cîhanê di 5 welatan de hatin




meşandin ku Komara Îslamî a Îranê û Çîn ji van welatan in. Di sala borî de, 1252 xalên daliqandinê di 24 welatên cîhanê de hatine tomarkirin.

## Xebatkarê Dêrîn Yê PDK Îranê, Qadir Sultanpenah Koça Dawiyê Kir

► Mixabin êvariya roja sêşem, 14'ê Çiriya Pêşîn a 2008'an, Kekê **Qadir Sultanpenah**, xebatkarê dêrîn yê PDKÎ bi sedema nexweşiya dil koça dawiyê kir.

Kekê Qadir Sultanpenah kurê Salih, sala 1934'an li gundê Talecer ser bi bajarê Seqizê ji dayîk bû. Wî heta çara paşnavendî xwendiyê û li sala 1957'an bûye endamê PDKÎ. Sala 1943'an ji aliyê rejîma Şahensahî ya Îranê ve hate girtin û bo dema 3 salan di girtîgehê de ma.

Navhatî yek ji endamên çeleng yê PDKÎ li bajarê Seqiz û derdorê bûye û sala 1980'an Fermanderê Hêza Ezîz Yûsifî bûye. Di sala 1981'an de berpirsiyarê Komîte Şaristana Seqizê bûye û heyamekê jî berpirsiyarê Komîte Şaristana PDKÎ a bajarê Diwandere bûye. Kekê Qadir Sultanpenah demekê hevkarê rojnameya NEKEROZ bûye û sala



1986'an di Komîsyona Siyasî – Nizamî a PDKÎ de erkê partyê dimeşand. Navhatî sala 1994'an, bo dema 9 mehan berpirsiyarê Melbenda 2 bû û sala 1997'an li Bazyanê Berpirsê Komîteya Bane û Pawe bû. Qadir Sultanpenah Kadroyê derece du ê PDKÎ bû û di van salên dawiyê de jî di Komîsyona Siyasî – Nizamî de karê xwe yê partyê dimeşand.

Bi hilkevta koça dawiyê ya xebatkarê dêrîn, Kekê Qadir Sultanpenah ve, em behî û sersaxiya xwe pêşkêşî malbata wî û Kadro û Pêşmergeyên PDKÎ û hemû xelkê Kurdistanê dikin.

Riha wî şad be û rêya wî teji serwerî û rêvîng be.

## Semînerê Ji Bo Hesên Şerefî ...



2

## Peyamên kongreya 14'hem a PDK Îranê...



3

## Ehmedînijad; Etom, Antî Semîtîsm û Azadîkujî



5

## Jinên Kurdistanê



7

## Pirsgirêkên Mirovahiyê



9

## Di Civînekê De, Rêzdar Hesên Şerefî Kar û Encamên Kongreya 14'hem A PDK Îranê Ji Bo Endamên Partiyê Li Silêmanî û Herêmên Derdora Wê Şirove Kir

**C**ivîna han roja sêşem, 08.10.2008'an,

bi beşdariya **Ehmed Rehîmî**, endamê Komîteya Navendî û hejmarek zaf ji endamên partiyê li bajarê Silêmanî û herêmên derdora wê û herwiha hejmarek ji Kadro û Pêşmergeyên partiyê li wî bajarî hate



lidarxistin.

Civîn bi ragirtina deqîqeyek bêdengî bona rêzgirtin ji canê paqij yê şehîdan dest pê kir.

Piştê Cîgirê Sekreterê Giştî yê PDKÎ dest bi axavtîna kir û bal kişande ser du mijarên pêkhate û siyasîyên Kongreya 14'hem a partiyê. Birêz Şerefî awayê hîlbijartin, ewlekarî û weşandina xebatên Kongreyê di ragihandinên partiyê weke beşek ji taybetmendiyên ve kongrê anîn ziman.

Piştê li ser dirûşma Kongreya Çardehem a partiyê axivî û got: Dirûşma kongreyê (Geşekirin û Gelitîrkirina xebatê), xuyakerê wê yekê bû ku partiyê xwe jê re amade kiribû, yanî di hemû waran de pêşde biçê û bala xelkeke zêdetir ji hemû aliyan ve ber bi aliyê xebatê rabikişîne.

Beşeke din a axavtina rêzdar Hesên Şerefî awayê birêveçûna kongreyê bû. Di beşa siyasî a civînê de, Cîgirê

Sekreterê Giştî yê PDKÎ çend pirsên girîng ku di kongrê de bi hûrî û berfirehî basa wan hatibû kirin, anî rojevê. Herwiha qala naveroka dewlemend a kongreyê kir û beşdariya çeleng a endamê kongrê di bas û nîqaşên siyasî de weke yek ji xalên erênî ên kongreya 14'hem zanî.

Birêz Şerefî di beşeke din a axavtina xwe de bal kişande ser girîngîdan bi hêza ciwan û jinan û beşdarîkirina wan di nav kar û xebatên partiyê û anîna wan du qatan bo nav rêberiya partiyê.

Di dawîya axavtina xwe de, Cîgirê Sekreterê Giştî yê PDKÎ rasipartiyên Kongreya 14'hem ji bo rêberiya hîlbijartî ya Kongrê, ji beşdarên civînê re şirove kir.

Di dawîya civînê de, beşdarên rexne, têdîtî û pêşniyarên xwe rabe rîzdar Hesên Şerefî kirin ku ji aliyê wî ve hatin bersivdan.

## Şandekê YNK'ê Serdana Deftera Siyasî A PDK Îranê Kir

**R**oja îne, 10.10.2008'an, şandek ji Yekîtiya Nîştîmanîya Kurdistanê

bi serokatiya **Sedî Ehmed Pîre**, serdana Deftera Siyasî a Partiya Demokrat a Kurdistanê Îranê kir ku ji aliyê şandek ji PDK Îranê bi serokatiya Mistefa Hicrî ve bi germî hate pêşwazîkirin. Di vê hevdişînê de basek siyasî li ser rewşa



Îraq û Kurdistan û pîrsa Îran û Opozîsyona Îranê hate kirin. Sedî Ehmed Pîre, carek din kêfxweşiya xwe ji encamên Kongreya 14'hem a PDK Îranê diyar kir û pîrozbahî ji rêzdar

Mistefa Hicrî û gişt tekoşerên Partiya Demokrat kir.

Di dawiyê de her du aliyan li ser berfirehbûna pêwendiyên di navbera hevdu de tekez kirin.

## Şandek Ji Nûnerên Çend Partiyên Kurdistanê, Serdana PDK Îranê Kir

► Roja 09.10.2008'an, şandek pêkhatî ji birêzan **Mistefa Îbrahîm**, nûnerê Partiya Demokrat a Kurd li Sûriyê (El partî), **Elî Şemdin**, nûnerê Partiya Demokrat a Pêşverû ya Kurd li Sûriyê, **Dr. Kawe Ezizî**, nûnerê Partiya Azad a Kurd li



Sûriyê, **Mehmûd Mihemedbaqî Sabir**, nûnerê Partiya Yekîtiya Demokrat a Kurd li Sûriyê (Yekîti) û **Mezher Zîmrût**, nûnerê Partiya Maf û Azadiyan (HAK-PAR), bi armanca pîrozbahîkirina bidawîhatina 14'hemîn Kongreya PDK Îranê serdana Deftera Siyasî a Partiya Demokrat kirin ku ji aliyê şandekê ve partiyê bi serokatiya Mistefa Hicrî, Sekreterê Giştî yê PDK Îranê bi germî hatin pêşwazîkirin.

## Şandek Ji Partiya Sosyalîst A Kurdistanê, Serdana PDK Îranê Kir

► Roja yekşem, 05.10.2008'an, şandek ji Partiya Sosyalîst a Kurdistanê, bi serokatiya **Mesûd Tek**, Sekreterê ve partiyê, serdana PDK Îranê kir ku ji aliyê şandek ji Partiya Demokrat a Kurdistanê Îranê bi serokatiya Mistefa Hicrî, bi germî hate pêşwazîkirin. Di vê hevdişînê de Mesûd Tek, bi hinceta bi dawîhatina



serkevtiyane ya Kongreya 14'hem a PDKÎ, ji aliyê Partiya Sosyalîst a Kurdistanê ve, germîtirîn pîrozbahî pêşkêş kir. Piştê li ser zirûfa siyasî a Turkiyê bi giştî û Kurdistanê Turkiyê bi taybetî axivî û îşare bi bînpêkirina mafê mirovan di wî welaatî de kir. Di doma vê civînê de, Mistefa Hicrî sîstema hukûmetî li Îranê û xebata xelkê Îranê û PDK Îranê bona dabînkirina mafên berheq ên netewa Kurd di Kurdistanê Îranê de anî berbas.

Di dawiyê de her du aliyan tekez li ser berfirehtirbûna dostayetiya di navbera hevdu de kirin.



Xwendevanên hêja ên Agirî, Kongreya 14'hem ya PDKÎ di navbera rojên 10-14'ê Îlona 2008'an, hat lidarxistin.

Di kongreyê de gellek biryar û helwestên girîng hatin girtin. Kongreya 14'hem 9 peyamên taybet ji bo malbatên Şehîdan, girtiyên siyasî, civatên xelkê Kurdistanê, endam û Kadro û Pêşmergeyên partiyê, Konseya Mafên Mirovan a Rêxistina Neteweyên Yekbûyî, Jinan, Ciwanan, Xwendekaran û Kongreya Neteweyên Îrana Federal şand. Weşana Agirî ji ber girîngbûna wan peyaman, di hejmara 96'an de, çar peyam hatin belavkirin. Di vê hejmarê de ji deqa her 5 hejmarên din te weşandin

## Peyam Ji Bo Xwendekarên Azadîxwaz

**Xwendekarên xebatkar!**  
**Keç û xortên hişyar ên welat!**  
Hûn rêvîngên rêya pîroz a zanist û

fêrbûnê, hilgîrên çirayê agahî û hişyariyê, wergîrên destkevt û pêşketinên nû ên cîhanê û birêveberên pêşeroja welat, xwendin û fêrbûna we di cihê pîroz weke zanîngehê de, erk û gaveke pêşkevtî û xizmet bi pêşeroja welat û xelkê ye. Hînbûna we bi metodên zanistî û rexnegirane di zanîngehê de, çavê we ji bo dîtina rastiyên tûjtir û bîr û hizra we vekirîtir û hevdem erkê we yê neteweyî qurştir dîke. Di civakeke bin destê dîktatorî û sistema kevneperest de, hûn hêviya hatine rojve tîrêja zanebûn û zaniyariyê ne û divê agahî û li ser sehbûnê ji bo zanîngeh û kûrahiya civakê veguhêzin.

Hevdem tevî wî erkî, di welatê bin destê dîktatorî û çewisandinê de, hûn nîşek bihest û armancxwaz in ku ji bo bidevanebûna azadî û dadperweriyê xebat û tekoşinê dikin.

Her weke ku dîroka bizava xwendekarî di Îranê de nîşan daye, di demên hestiyar de, hûn di refa herî pêş a serhildan û rabûnê de bûne û di van çend salên dawiyê de jî, we nîşan da ku her wisa biwêr in. Êrîşa hovane a hêzên rejîmê bo cihên xwendin û hînbûna we, xuyakerê tîrsa zaf a nezanan ji agahî û hişyariya we ye.

Erxayîn bin ku xebat û rabûna we li dijî dîktatorî, zordarî û stemê, dê her berdevam be û hûn yek ji hilgîrên erkê dabînbûna demokrasîyê di Îranê de ne û kongreya 14'hem a PDK Îranê, piştewaniya partiyê ji xebat û tekoşîna we dubare dîke.

**Xwendekarên çavnetirs ên Kurd!**

We egîdên biemegê ên welat û neteweya me, serbarê xebata azadîxwazane û dijî nezaniyê, erkê herî girîng yê neteweyî jî li ser stûyê xwe hilgirtiye û birêve dibin.

Hûn bi xwendin û perwerdebûnê û veguhastina zaniyarî û hizran ji bo neteweya xwe ya bindest, li dijî nezanhêstina xelkê xwe xebatê dikin. Rejîmên pawanxwaz û tarîperest ên zal bi ser Kurdistanê, herdem hewl dane ku neteweya me di nezanî û neagahiyê de bihêlin û hûn çirayê ronahîker di Kurdistanê de ne ku bi hilkirina bi hezaran ji we, esman, çiya û bajarên Kurdistanê ronahî dibin.

Ji aliyê din ve, hûn dengê mafxwaz û azadîxwaz yê neteweyek bindest in û xebata we ji bo nasnameya we a Kurdbûnê, berxwedan li hember tarîtiyê û biçokdeanîna bêdengîya bi zor sepanî û xebata mafxwazane û azadîxwazane a we di çepera zanîngehê de, dirêjiya xebata neteweyî – demokratîk a Kurd di Kurdistana Îranê de ye.

Hûn bi xebat û serhildan û berxwedana xwe, perdê li ser derew û dekên desthilata zal hil didin û demargirî û fêlkariyên desthilata tepeserker, di biyava giştî de eşker dikin û siyaseta dikin rojeva xebata cemawerî û giştî.

Hûn Pêşmergeyên Kurdistanê di çepera azadîxwazî û hizirmendî a zanîngehê de, nîşanê di nav çavên nezanî û dîktatoriyê de digirin. Kongreya 14'hem a Partiya Demokrat a Kurdistana Îranê, kongreya pêşdeçûn û gellîtkirina xebatê, piştewaniyê ji xebat û tekoşîna we dîke û pê li ser vê



çendê diçeçîne ku xebata tevalî û azadîxwazane a neteweya me, hewcehiyek zaf bi beşdariya tev tex û qatên civakê û bi taybet nîşka hişyar û agah a xwendekar, keç û xortên têgihîştî û pêgihîştî ên Kurd heye û beşdariya tev çin û qatan di xebata rewa û mafxwazane a Kurdistanê de, garantîkerê rizgarî, azadî û demokrasîyê ye.

Kongreya pêşdeçûn û gellîtkirina xebatê, we xwendekarên xebatkar weke Pêşmergeyên Kurdistanê di çepera zanîngeh û qada xebat li dijî rejîma nezanperest de dizane û piştewan û hevrêyê we ye.

Silav li xebat û tekoşîna azadîxwazane û rizgarîxwazane a we

Silav li wêrekê û netirsiya we

Silav li hizra rexnegir û serdemiyane a we Serkeve azadî û dadperwerî

**Kongreya Çardehem a PDKÎ  
Îlona 2008**

## Peyam Ji Bo Kongreya Neteweyên Îrana Federal

**R**êxistin û partiyên endam di Kongreya Neteweyên Îrana Federal de!

tevî rêz û silavan!

Partiya Demokrat a Kurdistana Îranê, weke yek ji endamên Kongreya Neteweyên Îrana Federal, 14'hemîn Kongreya xwe "Kongreya Pêşdeçûn û Gellîtkirina Xebatê" di roja 10.09.2008'an, lidarxist. 14'hemîn kongreya PDK Îranê di gengeşeyên pêwendîdar bi Îranê û şirovekirina rewşa opozîsyona demokrat de, pêkanîna Kongreya Neteweyên Îrana Federal weke destkevtê mezî û girîng zanî bona hevgirtina neteweyên bindest li Îranê di pêxema gihîştin bi demokrasî di wî welatî de û dabînbûna mafê netewî yên

neteweyên Îranê, yekgirtinek ku di pêvajoya xebata azadîxwazane ya Îranê kêmmînak yan bêmînak bûye.

Bê şik gihîştin bi destkevtê han, di pêş de vedigere ser hevderdî û seha wekhev a neteweyên bindest li Îranê li dor yekîtiya saziyek han ne tenê ji bo rejîma Komara Îslamî weke sistemek nedemokratîk û bînpêkerê mafê mirovan û mafê neteweyên Îranî, nexweş e, belku ji bo wan hêzên opozîsyona Îranê ku dijberî tevî dabînbûna mafê neteweyî li Îranê dikin, cihê nigeraniyê ye.

Lewra em bawer in ku divê saziya han di warên cur bi cur de pitir were çalakî û bihêztir kirin.

Partiya Demokrat a Kurdistana Îranê di vê derbarê de bi başî agahdarê wezîfeyên xwe heye û amade ye bona

çalaktir kirin û nasandina zêdetir a KNÎF ku partiyên endam ên wê di warê hizrî, siyasî û bi kiryar de, neteweyên bindest yên Îranê rêberî dikin, zêdetir kar û çalakiyan bike da ku bikare bandora kongreya han li ser bûyerên Îranê bihêztir bike û bibe xwedî rolek erênî di pêşerojeya Îranê de.

Em destê yek yeke endamên Kongrê diguhişînin û li ser hevkarî û yekgirtina zêdetir di pêvajoya xebat li dijî rejîma Komara Îslamî a Îranê tekezê dikin.

Bihêztir be hevgirtina neteweyên bindest li Îranê bona gihîştin bi demokrasî li Îranê û dabînbûna mafê neteweyî a neteweyên Îranê.

**Kongreya 14'hem a PDK Îranê  
Îlona 2008**

## Peyam Ji Bo Endam, Kadro û Pêşmergeyên PDKÎ

**H**evalên hêja!  
Li gor azî û usûlên demokratîk ên partiya me, bi xweşî ve kongreyên

partiyê di rewşên heta aloz û dijwar de jî hatine lidarxistin, ji bo ku bi wext rewşa giştî a cîhan, herêm, Îran û Kurdistanê û hemû guhartin bihêne nirxandin û em bi kar û çalakîyên derbazbûyî de biçin û rêbaza hêja û jêhatî ji bo domandina xebatê destnîşan bikin.

Kongreya me a vê carê, Kongreya 14'hem, Kongreya Pêşdeçûn û Gellîtkirina Xebatê di meha Xermanan(Îlona 2008)ê de birêve çû û her wekî dihat pêşdîtkirin û bernamerêjî jê re hatibû kirin, bi awayekî serûber erkên xwe encam da.

Beşdarên vê Kongreyê silavên rêz û emegdariyê pêşkêşî we dikin û spasiya kar û tekoşîna yek yekê we xebatkarên PDK Îranê dikin ku di heyamê çar salên borî de jî we bêrawestan fidakarî û çalakî meşandine û di pêşdebirina pêvajoya xebata me a berheq de bi bandor bûn. Kongreyê di şirovekirina xwe de hewl û cehd û fidakariya we bi yek ji sedemên serbilindî û domandina pêvajoya berxwedana tevgera Kurd li Kurdistanê Îranê bi rêberiya partiya me a xebatkar dana û di vê derheqê de bi rêz û hurmet ve mêzeyî dilsozî

û hewla mandînenasane a we kir. Beşdarên Kongreyê bi vê yekê xemgîn bûn ku cihê nûnerên endamên partiye li hundirê welat yan yên ku bi liv û tevgerên nerazîbûna xwe piştê rejîmê lerizandin, vala û betal bû, eva jî vedigere bo rewşekê ku kongre tê de hate girtin. Em hêvîdar in ku kongreyên pêşerojê li Kurdistanê azad û bi amadebûna wan ezîzan bihê lidarxistin.

Hevalên rêzdar!

Bêguman dirûşma Kongreya Çardehem a partiye yanî "Pêşdeçûn û Gellîtkirina Xebatê" erkeke gellek qurs û giran dixê ser milê Kadro, Pêşmerge û endamên PDKÎ li her cihê, ji bo ku ew dirûşma bihê praktîzekirin û armançên xwe bi awayê hewce bişope.

Ji bo bicîanîna wê meremê me hewcehî bi dîsîplin û serûberiyê zêdetir, bizane û qanûnmendiyê bêtir di kar û pêwendiya navbera organên partiye de heye, xuya û eşkere ye jî, her çiqas pêvajoya xebata me pêşde biçê û berfirehtir bibe, rejîma Komara Îslamî a Îranê weke rejîmeke dijîgêlî hartir û her wekî heta niha jî nîşan daye bandoreke zêdetir di kompo û serkut û çewisandinê de diîfze. Lewra ji bo betalkirina her pîlaneke rejîmê pêwîst e endam, ağırî û Kadro û

Pêşmergeyên partiye bêtir hest bi berpirsiyariyê bikin, wurya û hişyar tevbigere. Ji ber ku sermaye esîf û piştevan û stûna piştê partiya me ne. Ew partiya ku neteweyek bi çavê hêvî û xweziyan lê dinêre û yê bûye çiqala çavê dijminên gelê Kurd. Di heman demê de, hewce ye her kiryar û liv û lebateke xebatkarên demokrat bersivderê wê piestîj, hitbar û ew rûçikê demokrat be ku naveroka partiya me pê hatîye nasîn û qelafeta wê pê hatîye xemilandin. Di yekemîn gotinê de, divê em xwe ji bo pêvajoyeke nû ji xebatê ew jî bi kiryar û liv û lebateke demokratîk amade bikin û qonaxêke din ber bi serkevîtinê biberrin. Di vê derbarê de li ser hewl, cehd û xebata mandînenasane a we hesabeke taybet tê kirin.

Carêke din em destê hevaltiya we diguhişin, gavên we xurttir, rêya serkevîtinê kêmnavbertir, xweştewîbûna we di nav dilê civatên xelkê Kurdistanê de zêdetir û zêdetir be.

**Kongreya Çardehem a Partiya Demokrat ya Kurdistanê Îranê  
Îlona 2008**

## Peyam Ji Bo Ciwanên Kurd Li Kurdistanê Îranê

**K**ongreya PDK Îranê, bi baldan bi vê çendê ku hêza ciwan, di civaka Kurdistanê de ji aliyekî ve xwediyê

îro û pêşeroja civakê ye û ji aliyekî din ve, ji bo peydakirina pênasekirin ji xwe û nîştimana me re erkdar e, her di destpêka avabûna xwe de, li ser vê bawerê bûye ku vê nîfşê, ektîvtir û bihêztir bike. Bo vê meremê jî roleke sereke di avakirina Yekîtiya Ciwanên Demokrat ên Kurdistanê Îranê de list û harîkarê wê çendê bûye ku ciwanên Kurd serbarê hindê ku di pêxema bidestxistina mafên neteweyî yên xwe dixebite, newestane ji bo dabînbûna mafên sivil ên xwe hewlê dide û di encam de li dengdan, birêveberî û desthilatî û avakirina welat û darêtina yasa û tev aliyên din pişikdar be û asûde bijî û seh bi hebûna xwe weke hevvelatiyekî bike û rola xwe weke hevvelatî bilîze.

Di serdemê îro de ku mirovahî bi destkevtên berçav ên mirovî û zanistî gihîştîye û teknolojiyê bilez diçe pêş û masmedyayê teqîneke berfireh bi xwe ve girtiye û pîrsa cîhanîbûnê yê bûye qîsa ser zîmanan, erkê ciwanê Kurd li caran girantir e û hewce ye ku di vê qonaxê de xwe ji bo vê çendê berhev bikin ku li karwanê pêşketinê bi cî nemînin.

Niha di Îranê û Kurdistanê de, rojnamevan, rewşenbîr û çalakên mafê mirovan, ji aliyê rejîma dîktator ya Komara Îslamî ve tîn girtin, îşkence û darvekirin û herwiha canê xwe ji dest didin.

Ciwanên Kurd, cuda ji vê çendê ku mekanîzmeke jêhatî bo berengarkirin tevî

rejîmê di Kurdistanê de peyda kirine, li ser astê giştî yê Îranê jî, bi kiryar selimandine ku weke hêzek ektîv û jêhatî, rêber û rolgerên bizavên cur bi cur yên din li dijî dîktatoriye ne. Di berhevdanekê de derheq ciwanên Kurd û rola wan di civakê de û bandora wan derheq raya giştî, ji me re rohn û eşkere diibe ku ew afirînên awayên herî nû ên xebatê di qada siyasî ya Kurdistanê Îranê de ne.

Girevgirtinê li pey hev, hatina ser şeqaman, bizavê xwendekarî û xebitîna ciwanên Kurd di pêxema cihgîrbûna demokrasiyê li Îranê û gihîştina Kurdan bi mafê xwe, ji van nimûnanan in ku îro em şahidê vê çendê ne ku ji aliyê ciwanan ve tîn rêxistin û rêbaz û awayên wan jê re tê diyarîkirin û her di vê derheqê de rola ciwanan bo pêşwazîkirin ji xwestekên Partiya Demokrat ji bo organîzekirina girevgirtinan û beşdarîkirina wan di hilkevîtinê cur bi cur ên neteweyî û siyasî de li berçav e û Partiya Demokrat rûmet û şanazyê bi hebûna nîfşeke wisa di civaka Kurdistanê de dike.

Kongreya Çardehem a PDK Îranê, çavniheriya vê çendê ji ciwanên Kurdistanê heye ku di vê xebata giştî û gelî a Kurdistanê Îranê de, roleke ektîvtir û berçavtir bigirin stûyê xwe û vê xebatê di roj, heftî, hevy û salên pêşerojê de, bihêztir û ektîvtir bimeşînin.

Serkevîtin ji bo Kurd û azadîxwazan  
Neman ji bo Komara Îslamî a Îranê

**Kongreya Çardehem a PDK Îranê  
Îlona 2008**

## Peyam Ji Bo Jinên Kurdistanê

► Kongreya 14'hemîn a PDK Îranê, silavên xwe ên şoreşvanî pêşkêşî jinên Kurdistanê Îranê dike û hêviyê dixwaze ku jinên Kurdistanê Îranê bikarin di xebata xwe de bona dabînkirina maf û azadiyên xwe ser bikevin.

PDK Îranê bi çavê pîrr ji hêvî ve mêzeyî xebat û berxwedana jinên Kurdistanê Îranê bona ji holê rakirina newekhevî û bêdadiyên ku ji aliyê rejîma Komara Îslamî di Îranê de li dijî wan pêk hatîye, dike.

Xebat û berxwedanek ku niha bi awayekî haşanekirî bûye çeperek mezin ji bo bizav û xebata netewî - demokratîk a xelkê Kurdistanê Îranê.

Em pîrr keyfxweş û serbilind in ku dibînin bizava jinan di Kurdistanê de bi awayekî berçav xurt bûye û xwe organîze kiriye. Xebatkarên jinan jî mil bi milê tekoşerên bizavên siyasî, çandî û civakî yên din li Kurdistanê, di çepera herî pêş a xebatê de ne.

PDK Îranê xebata jinên Kurdistanê Îranê di pêxema maf û azadiyên wan de, berheq dizane û dê bi hemû hêza xwe piştevaniya ji wan bike.

PDK Îranê ji rêya tirîbûna organa xwe a herî bilind ve, car din hevpeywendiya Partiya Demokrat tevî jinên Kurdistanê, radigihîne û sozê dide we ku dê hemû cure hevkarîyê bona dabînbûna mafên jinan bike. Her di wê demê de em weke PDK Îranê daxwazê dikin ku hûn jî bi beşdariya xwe a berfireh di xebata Kurdistanê de, bizava netewa me xurttir û bihêztir bikin û rolên di bandortir bigirin destên xwe.

**Kongreya Çardehem a PDK Îranê  
Îlona 2008**

## RONÎ

Quncikek ji bo şiroveya bûyer û babetan ji xwendevanên "Agirî" re

Ebdullah Hicab



## Ehmedîniyad; Etom, Antî Semîtîsm û Azadîkujî

**D**ijkiyara Rojava li hember helwêsta antî semîtîstî ya Mehmûd Ehmedîniyad ku di civîna

meha Xermanan (Îlon)ê ya Civata Giştî ya Rêxistina Netewên Yekgirtî de anî ziman, tûj, bi lez û di cihê xwe de bû. Ehmedîniyad di wê civînê de bi hêceta dijberiya bi siyaseta Îsraîlê re, helwêsta xwe ya dijî xelkê Cihû dubare eşkere kir û hemû Cihûyên cihanê weke "sionîstên mirovkuj" dane nasandin ku bi awayekî berfireh aborî û siyaseta Rojava kontrol diikin. Serbarê vê yekê ku ew helwêst di çarçoveya giştî ya siyaseta Komara Îslamî de bû, lê gotinên Ehmedîniyad weke tehlûkeyek nû ya rêjîma Îranê bo Îsraîlê hate nirxandin û di hember de helwêstek tûj hate girtin.

Ehmedîniyad di wê civînê de, her weha di derbarê dosya Etomî ya welatê xwe de jî axivî û di wê mijarê de jî helwêstek nîşan da ku bi dilê Rojava nebû. Li ser wê mijarê jî reaksiyonên cihanê tund û li cihê xwe bûn. Dijkiyara koma 5 + 1 ku dubare ji Îranê daxwaz kir her 3 biryarnamayan pêşin ên komê birêve bibe, di wê çarçoveyê de hate temaşekirin.

Lê serokkomarê Îranê, di heman civînê de li ser ramana xwe ya derheqa azadî û mirovahiyê jî axivî. Wî bi heman şeweya ku li dijî rola Cihûyan di siyaseta Rojava de axivî û mafê xwe yê bidestxistina teknolojiya navîkî parast, li ser îdealên mirovahiyê û mafê mirovan jî helwêsta xwe ya antî demokratîk nîşan da û diyar kir ew û rêjîma wî tu manayê nadin wan mijaran. Li ser wan babetan, Rojava û dewleta Îsraîl reaksiyonek wesana li dijî Ehmedîniyad û gotinên wî nîşan nedan. Weke çawa tu bêjî ew mijar bi hev re girêdayî nebin û serekaniya hemûyan îdeolojiya fermî ya Komara Îslamî nebe!

Siyaseta antî semîtîstî, an dijberiya bi gelê Cihû re bi salan e ji aliyê rêjîma Komara Îslamî ve tê meşandin, û propagandeya dijî Cihûyan û dewleta Îsraîl di medya û siyaseta fermî ya rêjîmê de deng vedide, lê tu gav ji aliyê gelên Îranê ve nehatiye erêkirin. Bi gotinekê hê eşkere, ew dijberiyên ku li dirêjahiya dirokê, bi şeweyên cuda li deverên cihê yê cihanê bi xelkê Cihû re hatiye kirin, heta ku Komara Îslamî li Îranê nehatibû ser kar, di nava gelên Îranê de tune bû û

çi gav gotin an kirinek li dijî berjewendî an mafê xelkê Cihû li Îranê nehate encamdan û di Îrana bin desthilata Komara Îslamî de jî, digel ku nirxa wê jî hatibe dan, dîsan hemû kes û aliyên parêzerê mafê mirovan li hember wê helwêsta dijî mirovahiyê de dijkiyara nîşan dane û ew helwêsta Komara Îslamî ji destpêkê re şermezar kirine.

Siyaseta Mehmûd Ehmedîniyad û hevberên wî ne bi tenê di warê projeya Etomî ya Îranê û dijberiya Cihûyan re li dijî mirovahî û aştiya cihanî ye, lê her wesana di warê mafê mirov û aştiya cihanî de jî li dijî hemû pîvan û qirarên mirovahiyê ye. Ew hilgirê îdeolojiyê ye ku li cihê aşti û hevkarîyê, kîn û dijberiyê li cihanê belav dike û serhostayê wê siyaseta jî ne ku Ehmedîniyad, lê di destpêkê de mamostê wî ê dil pirr ji kîn, Ayetullah Xumeynî bû ku ji salên deheya 60 a sedsala 20'an ve bingeha îdeolojiya tundrev ya Komara Îslamî danî.

Ehmedîniyad bi tenê rêvîngêk bê desthilat yê rêya wê mektebê ye ku ji sala 1979 û pêve hemû Rojhilata Navîn kiriye meydana şer û şofar û şevreşiyê. Di destpêkê de gelê Kurd li Rojhilata Kurdistanê bû qurbanîyê wê bîroka dijmirovahiyê. Kurd weke dijber û dijminê îdeolojiya Komara Îslamî hatin nasandin û Kurdistan bû yekem armanca şerê rêjîmê. Ji wê demê û heya niha, her carê bi awayekê û her demê bi navekê girtin û kuştina Kurdan û bînpêkirina mafê mirovan li Kurdistanê berdeham bûye.

Her di wan çar salên ku Mehmûd Ehmedîniyad bûye serokkomar heya niha, li bajarên cuda yên Rojhilata Kurdistanê bi dehan kes hatine kuştin, bi sedan kes hatine girtin û îşkencekirin û hemû Kurdistan dubare hatiye mîlîtarîzekirin. Pêlên îdamê di wan mehên dawî de zêde bûye û komek xebatkarên mafê mirovan û rojnamevanên Kurd di girtîgehan de bi îdamê re rûbirû ne.

"Amnesty International" her di wê dema dawî de, bi 3 raporên cuda re wê mafê mirovan di herêmên Belûçistan, Ahwaz û Kurdisatanê di dema serokkomariya Mehmûd Ehmedîniyad de eşkere kir. Her yek ji wan raporên bi berfirehî bînpêkirinên mafên mirovan di wan herêman de nîşan dide. Her di wê

demê de rola Komara Îslamî di alozkiyana rewşa Îraq û Efxanistanê de diyar û berçav e. Gelo bi wan hemû dosyeyên cinayet û mirovkujîyê re, ma her bi tenê siloganên Ehmedîniyad li dijî Îsraîl û projeya Etomî ya Îranê weke metirsiyê li dijî mirovahiyê têne temaşekirin?

Di Îrana Ehmedîniyad de her roj mafê mirovan û azadî têne bînpêkirin. Kontrola dewletê li ser hemû warên jiyana xelkê zêde dibe, tak û kom weke alav û emrazên di destê sistemê de tîne temaşekirin û her carê grûpek dikeve ber kîn û xezeba desthilatdaran. Di destpêkê de Kurd, paşan hêzên çep û demokrat û cudabîr, li pey wan re kêmayetiyan ofî yen weke Behaiyan, dû wan re takekesên karbidest ên rêjîmê ku desthilata Welîyê Feqîh red dikin û niha jî rojnamevan û xebatkarên mafê mirovan. Her yek ji wan tak û grûpan bi awayekê û carna hemû bi hev re ketine ber darê destê rêjîma Komara Îslamî.

Dema Nazîstan li Almaniya û Faşîstan li Austriya (Otrîş) di şeva 9 li ser 10'ê heyva Novmbera sala 1938'an de "Kristallnacht" an şeva krîstal pêk anîn, pêvajoyekê dest pê kir ku di encama wê de bi miliyanon Cihû hatin qirrkirin û cihan kete nava aloziyêkê bê hempa ku dehan salan li pey wan bûyeran re jî hêj karîgeriya wê berçav e. Mesajên Ehmedîniyad dide û siyaseta ku di wan sê dehsalên dawî de Komara Îslamî meşandî û dimeşîne, pirr aliyên ve dişibe wê zêhniyeta ku şeva Krîstal xuliqand. Dijberiya bi pêvajoya aştiyê li Filistinê, pîrçekkirina grûpên tundajo yên terorîst li Efxanistanê bigre heya Lubnan û welatên Ewropayî, vejiyandina binajoyî û kevneperestiyê, zext û givaş li ser gelê Kurd û gelên din yên Îranê, zêhniyeta alozîxulqên û çandina toyê tund û tûjî, alozî û dijberiyê hemû berhemên Komara Îslamî ne.

Di wê rewşê de eger Rojava bi tenê li ser dosya Etomî raweste û car û bar gefên Ehmedîniyad li dijî Îsraîlê rexne bike, dê bikeve nava şaşitiyekê ku di dawiyê de qerebûkirina wê zehmet e. Pîrsa ku tê pêş ew e gelo madem nehatiye ku Cihan hemû warên siyaseta Komara Îslamî bi hev re temaş bike û li hember wê rêjîmê de helwêstek hemûalî û ron bigre ber?



## Peyama Nesrîn Qasimlo Ji Bo 14'hemîn Kongreya PDKÎ

**S**ilav li Kongreya Çardehem a Partiya Demokrat a Kurdistanana Îranê!  
Hevalên delal, ji wê demê şûnde ku Kongreya Sêyem a partiye hat lidarxistin, yanî 35 salan berî niha, Partiya Demokrat di navbera du heta çar salan bi awayê serûber kongreyên xwe pêk tîne, nemir Dr. Abdurrahman Qasimlo ji berrava kongreya 3 heta 19 salan berî niha di pileya yekem a partiye de bûye û piştî şehîdkirina wî û Dr. Seîd, serbarê hemû arîşeyan, partiye karî ye bi başî li ser pêyê xwe raweste. Ew rastiye hêza rêxistinî û demokratîkbûna partiye diselimîne.

Derfetê bidin min, ez vê yekê bibîr bînim ku dîroka partiye, dîrokeke teji liv û tevger e, piştî vê çendê ku Şahê Îranê û Arteşa wê rejîmê karî derbeke qurs û giran li partiye bixin, bi vê hêviyê ku partiye ji nav bibin, çend kesên welatparêz biryar girtin ku partiye zindî rabigirin. Wan hin dem û salên dijwar bihurandin û pîrriya wan di vê rêyê de şehîd bûn.

Xebat ji bo azadî û dabînkirina mafê neteweyî, xebateke dijwar e. PDKÎ ji bo azadiya Kurdistanê xwîneke zaf daye. Heta niha jî dawî bi vê xebatê nehatiye.

Hevalên xweştevî!

Cîhana îro bi lezgînî ber bi pêşve diçe, lê hikûmeta Axundî(Mela) bernameyêke cuda ji pêşkevîna neteweyî heye. Hêviya neteweya Kurd bi we ye û çavnihêriya wan ewa ye ku hûn xebata xwe heta serkevtinê bidomînin.

Sedema vê çendê ku hûn îro di vê kongreyê de beşdar in, divê ewa be ku hûn dengê welatîyên xwe dibihîzin û amade ne bersivderê çavnihêriyên wan bibin.

Hêviya min ji we re eva ye ku tu demekê guleyên dijmin negihîjin we û heta hûn zindî û sax in, serkevtinê bibînin.

**Nesrîn Qasimlo**

**Parîs-18'ê Hezîrana 2008**

## Peyama Serokatîya Partîta Maf û Azadiyan-HAK-PAR Ji Bo Kongreya 14'hem A PDKÎ

**B**ayê ku ev 20 sal e dinyayê ber bi guhartinê ve diherikîne, bûye baxoz û hemê statukoyên Rojhilata Navîn dihejîne. Ew statukoyên ku bi sedan sal e gelê me di bin zilma wan de dinale, terrk lêketiye û li ber hilweşandinê ne. Gelê me yê li Başûrê Kurdistanê êdî di rewşek azad de ye û ji nû ve pêşeroja xwe ava dike. Tekoşîna azadî û rizgariyê, li Bakûr û Rojavayê Kurdistanê jî bînavber dom dike. Tekoşîna gelê me yê Kurdistanê ku bi dehan sal e li dijî rejîma hov û dagirker didome, ji bo hemû perçeyên din bûye labaratuwareke bêhempa û berhemdar. Ew agirê azadî û serxwebûnê ku li meydana Çarçirayê hatibû vêxistin, hê jî şewqa xwe li çiyayên Kurdistanê belav dike.

Îro jî tekoşîna azadiya Gelê Kurd di rê û şopa ku ji aliyê şehîdên nemir Qazî Mihemed, Qasimlo, Şerefkendî û şehîdên din yê Kurdistanê ve hatiye vekirin, tê meşandin û yadên wan e ku hêz didê me û riya me ronî dike. Em li ser wê baweriyê ne ku dê tekoşîna azadiyê ya li Rojhilatê welatê me, bi rêberî û pêşengiya Partiya Demokratîkî Kurdistanana Îranê bi serkeve.

Em bi navê endam û birêveberên Partiya Maf û Azadiyan bi rêz û hurmet silav li beşdarên Komcivîna Partiya Demokratîkî Kurdistanana Îranê dikin û ji Komcivînê re serkevtinê hêvî dikim.

Em hêvîdar in ku dê Komcivîna 14'an ya Partiya Demokratîkî Kurdistanana Îran di nav yekîtiyê û yekdengiyê de bi serkevtî derbas bibe û bi hêzeke xurt û rêkeftî di riya şehîdên nemir de ber bi azadiyê ve bimeşe. Ligel rêz û silavên biratî.

Bijî yekîtiyê û hevkarîya Gelê Kurd

**Serokatîya Partîta Maf û Azadiyan-HAK-PAR  
Amed-Bakûrê Kurdistanê**

## Şiroveya Peyvên Siyasî



**Berhevkar: Omîd Esxeran**  
**omid\_anbi@yahoo.com**

# Opozîsyon

**T**êgiha han ji zimanê firansî hatiye wergirtin û tê wateya dijberîkirin yan jî berxwedanê. Peyva han di wateya xwe ya berfirehtir de, pêkhatî ye ji hewl û

xebata sendîka û partiyan yan jî deste û kesan ji bo gihîştin bi armancekê ku li dijî xwestek û armanca desthilatdarên siyasî, aborî û civakî bi mifahwergirtin ji metodên parلمانî yan jî her şewazeke din e.

Di wateya xwe ya biçûktir de, pêkhatî ji girûpekê ye ku di hikûmeta parلمانî de li gor yasayên welat îfade pê hatiye kirin û di Parlemanê de girûpekê pêk tînin ku ser bi dewletê nîn e û piştevanîyê jî jê nake, lê serbarê vê çendê jî bawerî bi destûra welat heye.

Opozîsyona parlemanî beşdariyê di civînên parlemanê de dike û li gor yasayên diyarîkirî, çavdêriya rasterast bi ser kar û barên welat de dike û raya giştî ji jî vê çendê haydar dike.

Rola herî girîng a opozîsyonê eva ye ku derfet û kesya hîlbijartinek din ji bo xelkê pêk bîne hetanî ku hîlbijartinek baştir û erênitir were birêvebirin.

Opozîsyona bi vî awayî di hin welatên lîberal ên weke Îngîlistan, Fransa û Swêdê de, weke tewawkerê sîstema parلمانî tê hesabandin ku bi awayekê normal du partiyan sereke hene ku bi nobe rola desthilatdar û opozîsyonê listû digirin. Di welatên yek partî de opozîsyona fermî û yasayî ne di holê de ye û her cure dijberîkirinek tevî dewlet û partiya desthilatdar, weke dijberîkirin tevî destûr û ewlehiya giştî tê hesabandin.

Yekem opozîsyona siyasî di sedsala 18'an de li Bîrtaniyayê bi serhildana her du partiyan Wîg û Torî hate avakirin. Herçend ku du partiyan han di warê pêgeh û çavkaniya civakî ve tevî hev hevêl nebûn û di gellek waran de jî dişibiyên hev, lê hertim şerê piranî û kêmaniyê û çîguharta partiya desthilatdar û opozîsyonê, di nava wan de berdewam bû û sedema vê çendê jî zêdetir dijheviya siyasî, giştî û taybetî bû.

Di sîstemek bi giştî parلمانî de, opozîsyon wan erkan cîbicî dike ku di teoriya kilasîk(jihev cudakirina desthilatan) de ji bo Parlemanê hatiye diyarîkirin. Çunku ji wê demê ve ku sîstema parلمانî serî hildaye, hertim serokê dewletê û rêberiya piraniya Parlemanê hev digirin û hevgirtina han jî dikare rola Parlemanê weke çavdêrê cîbicîkirina yasa û desthilata yasadananê di çarçoveya destûrê de bixe tirsê. Lewra opozîsyon dikare weke alaveke girîng û bi bibandor, çavdêriyê bi ser desthilata cîbicîkirina welat de bike.

**Çavkanî: (Ferhengî Ramiyarî Nîga) Azad**

**Weledbegî**

**(Danêşnamêyê Siyasî) "Political Dictionary"**

**Daryûş Aşorî**

# Jinên Kurdistanê

Karin Loykfeld

**J**inên deverên Kurdakincî, (Îran, Îraq û Turkiye) nêzik sedeyekê ye ketine jêr zext û givaşên ku di encama şer,

koçberbûn û deb û edetên paremayî û kevin ên civaka mêrserdest de pêk hatine. Serbarê vê çendê ku pêwendî û deb û edetên civakî ên li jêr bandora çanda kevn û paşvemaî a ola Îslamê jî zext û givaşên han du qat kiriye. Helbet divêt ji bîr nekin ku hinek caran di gellek hoz û eşîran de, jin piştî mirina hevjinê xwe, berpirsiyariya birêvebirina eşîrê digire stûyê xwe. Jinên bitemen di nava malbatên xwe de xwedî pêgehek taybet in. Lê jinên devera han (Kurdistana Îranê) heya pêş avabûna Komara Kurdistanê, bi giştî nexwendewar bûn û ji perwerdehiya xwendinê hatibûne bêbeşkirin. Tenê malbatên dewlemend û serok eşîran dikarin zarokên xwe bona xwendinê bişînin navendên perwerdehiyê. Lê di malbatên han de jî keçan mafê xwendinê tune bûn. Çimku xelkên wê demê li ser vê baweriyê bûn ku erk û wezîfeyên keçan, maldarî, çêkirina mafûran, xwedîkirina zarokan û çêkirina alavên destî ên kevin e û divêt xwe hîne karên han bikin. Ji dayîkbûna yekemîn zarok û cinsiyeta wê, rolek mezin û girîng di jiyana hevbeş a keçên ciwan yê wê demê de diilîst. Çimku ji dayîkbûna zarokên kur, ji wan re gellek girîng bû. Tevî derbazbûna çendî salan û piştî pêkhatina guhertinan di zirûfa siyasî û civakî a welatên Turkiye, Îran û Îraqê de, rewşa jiyana jinên derverên Kurdakincî jî tevî guhartinan berbirû bû. Di deverên kurdakincî ên Îran û Îraqê de, navendên perwerdehiyê ên dewletî bona xwendinê hatin avakirin û di malbatên dewlemend de keçan jî weke xortan karî herin navendên xwendinê û dersê bixwînin.

Di Kurdistana Bakûr de seba hebûna çiyayên bilind û ketina gundan di navbera van çiyayan de û dûrbûna wan li bajaran û hatin û çûn nekirina xelkê gundên han bo bajaran û herwiha hebûna malbatên mezin ên mêrserdest di nava xelkê de, rewşek



minak li Başûrê Kurdistana Turkiyê, gellek jin di bin navê parastina namûsê de hatine kuştin. Hejmarek zaf ji saziyên jinan bona pêşgirtin ji cinayetên han ên nemirovî û hovane gellek hewil dane, lê mixabin bandorek wisa tune bûye. Heta gellek jinên gundên Kurdistana Turkiyê û Îraqê tu caran derfeta derketin ji gund û nasîyarbûn tevî jiyana

jinên bajêran tune bûne û qet hînî zimanek din xincî zimanê Kurdî jî nebûne. Di rastî de parêzere zimanê Kurdî di pileya yekem de jinên Kurd in. Jinên gundakincî ên Kurdistana Turkiyê ji gişt alav û amûrên destpêkî ên jiyana mirovî weke doxtor û dermanan û... bêpar in. Çimku bona seredankirina nêzikîrîn nexweşxanê, divêt çar rojan bi peyatî bimeşin. Jinên Kurd nikarin ji gundê xwe ve bo gundek din hatin û çûnê bikin, ger mêrên wan bi wan re nebin. Di dehika borî de li halekê ku hêzên Arteşa Turkiyê netewa Kurd ji gundên wan derxistiye û malên wan tevî axê kirine yek û gundên wan kavi kirine û malbat ji hev veqetandine, li halekê ku hêzên Arteşa Îraqê jin û mêr ji hev cuda kirin û mêr xistibûn nava zindanan, yan mêrên Kurd ên Pêşmerge ku di xebat li dijî Arteşê hatibûn şehîdkirin yan neçar mabûn derkevin derveyî welat, eva tenê jin bûn ku bargiraniya gişt zext û givaşan, êş û azaran bi dil û can girtibûn stûyê xwe. Kavilkirin û şewitandina pitir ji 3 hezar gundên Kurdistana Turkiyê bi destê Arteşa Faşîst a vî welatî zext û givaşek zaf xistibû ser milê jinên Kurd. Şerên berdewan ên Îraqê derbeyên rasterast xiste ser jiyana jinên êş û azardîtî ên Kurd. Îro rojê jî zilm û zordariyên han hêj dom dike. Qetilkirin û kuştina Kurdên Îranê ji aliyê rejîma Komara Îslamî a Îranê ve di doma çendî salan de, jinên Kurd di Kurdistana Îranê de rastî zext û givaşên zaf kiriye ku heya îro rojê jî zilm û zordariyên netewî û civakî li Îranê dom dike. Jinên Kurd bûne gorîyê şer û koçberî û zilm û zordariyên çend alî ku di heyama salên derbazbûyî de ji aliyê rejîmên dîktator ên herêmê ve bi ser wan de hatine sepandin. Ji aliyek din ve, sîstema bavserdestî a zal bi ser civaka Kurdistanê û dab û edetên kevin û pareyamî ên hakim bi ser malbatê û mana hoz û eşîran jî bûne sebeb ku jinên Kurd zêdetir bikevin bin zext û givaşan.





## Cezaya Zîndana Hana Ebdî Ji 5 Sal Bo Yek Sal Û Nîv Hate Kêmkirin

**L**i gor malpera "we-Change"ê (guhertin ji bo wekhevîyê) Mihemed Şerîf, Parêzerê Hana Ebdî ragihand: Dadgeha pêdeçûnê cezayê zîndana

Hana Ebdî ji 5 salan bo yek sal û nîvan kêm kir. Mihemed Şerîf got ku Hana Ebdî û Ronak Sefazade, nêzîkê 8 rojan e ku tevî gireva birçîbûna zîndaniyên siyasî û sîvil yê Kurd bûne û bi vê egerê hevdiîtin bi wan re hatiye qedexekirin. Mihemed Şerîf ku parêzerê Ronak Sefazade ye jî, ragihand ku yekemîn civîna dadgehîkirina wê hêj pêk nehatiye.



## Gundên Devera Qutûra Bajarê Xoyê, Ji Navendên Dermanî Û Dibistanan Bêpar In

**G**undên Almalî, Hindewanî û

Gûrd ên ser bi devera Qutûrê, tu dibistan û navendên xwendinê nînin, lewra zarokên



gundên han ji xwendinê bêpar bûne. Di gundê Almalî 180 malbat, li Hindewanê 200 malbat û li gundê Gûrdê 300 malbat dijîn.

## Hêzên Rejîmê Milk Û Malê Xelkê Gundên Sersînor Ên Selmasê Didizin

**H**êzên Sipaha Pasdaran ên rejîmê, heyamê du mehan e ku bi hêceta hebûna çek û guleyan diçine nava malên xelkê gundên sersînor ên devera Selmasê û lêgerîna di nava malê wan de dikin. Hêzên Sipaha Pasdaran bi vê hêcetê dest bi ser alav û amûrên taybetî ên xelkê

digirin û heta zêr û perê xelkê jî didizin. Hêzên rejîmê gotine ku dê pere û zêrên xelkê ji wan re vegehrînin, lê heya niha pere û zêre çendî kisan negihîştine destê wan. Herçend ku xelkê van gundane li dijî kiryarên han doz vekirine û şikayet kirine, lê rejîmê tu bersivê nedaye wan.

## Çalaka Mafê Mirovan A Kurd Hate Binçavkirin

**K**omeleya Çalakên Mafê Mirovan li Îranê da zanîn ku Nigîn Şêxolîslamî, çalaka mafê mirovan, roja

yekşem, 05.10.2008'an, ji aliyê hêzên ewlekarî ên rejîma Komara Îslamî li Tehranê hate girtin. Navhatî berê berpîrsa Civata Çandî-Civakî a Jinên Azermêhr a Kurdistanê bû û karê rojnamegeriyê jî kiriye. Nigîn Şêxolîslamî ji girtîgeha Êvînê re şandine.



## 5 Kasibkar Li Devera Selmasê Birîndar Bûn

► Hêzên ewlekarî ên Komara Îslamî a Îranê, roja 06.10.2008'an, li nêzîk gundê Bûzoka Selmasê, çendî kasibkar dane ber êrîşa guleyan û di encam de 5 kes birîndar bûn ku navê wan bi awayê jêrîn e:

1. Nesrula Osmanî, 14 salî, xelkê gundê Aşnakê
2. Mêhdî Osmanî, 17 salî, xelkê gundê Aşnakê



3. Wehbî Hesenazade, 18 salî, xelkê gundê Aşnakê
4. Nasir Esedzade, 18 salî, xelkê gundê Aşnakê
5. Feramerz Mamedî, 35 salî, xelkê gundê Bûzîkê.

## Rojeva Civakê

### Di Heyamê Salekê De 286 Kes Li Îranê Hatine Daliqandin

#### Agirî- Beşa Civakî

► Bi hinceta 10'ê Çiriya Pêşin, Roja Cihanî A Xebat Li Dijî Îdamê, çend saziyên parastina mafê mirovan, raporek li ser rewşa daliqandinê li Îranê belav kirin.

Di vê raporê de îsteya navê wan kesên ku di meha Çiriya Pêşin ya sala 2007'an, heya Îlona sala 2008'an, li Îranê hatine dardarkirin, hatiye nivîsandin.



Li gor rapora han biryara îdamkirina 286 kesên di heyamê salekê de li Îranê birêve çûye ku ev hejmare li dor sala 2006 – 2007'an, bi qasî 21 kesên zêdetir bûye.

Herwiha 45 kes ji wan di cihên giştî de û li hember çavên xelkê hatine îdamkirin ku di nava wan de jî 14 kes girtiyên siyasî û 4 kes jî jin bûne.

Di nava 177 kesên daliqandî de ku navên wan di raporê de hatiye, temenê 3 kesên jêrdeyî 18 saliyê bûye û temenê 64 kesên jî heya 30 saliyê bûye. Herwiha 13 kes ji wan di dema encamdana tawanê de li temenê jêrdeyî 18 saliyê bûne.

Hêjayê gotinê ye ku di heyamê amadekirina vê raporê de, biryara îdamkirinê ji bo 237 kesên din hatiye dan ku 6 kes ji wan bi kevirbaranê hatine mehkûmkirin. Herwiha di nava vê hejmarê de temenê 26 kesên jêrdeyî 18 saliyê ye û 25 kes jî jin in. Di rapora han de navê wan kesên ku li benda birêveçûna cezayê îdamê ne, nehatiye nivîsandin.

Saziyên ku rapora han belav kirine, daxwaz ji gişt azadîxwazan, navendên sîvil û çalakên mafên mirovan li Îranê û cihanê kirine ku bona betalkirina biryara îdamê li Îranê zêdetir hewlê bidin.

Navê wan Rêxistina bi awayê jêrîn e:

**Civata Parastina Girtiyên Siyasî Rêxistina Parastina Mafê Mirovan Li Kurdistanê**

**Çalakên Îranî Ên Parêzerê Mafê Mirovan Li Ewropa û Amerîkaya Bakûr**

**Komîteya Xwendekarî A Parastina Zîndaniyên Siyasî**

**Komîteya Parastina Girtiyên Siyasî Li Azerbaycanê**

**Komîteya Nûçegihanên Mafên Mirovan**



## PIRSGIRÊKÊN MIROVAHIYÊ

ADAR JIYAN  
adarjiyan@mynet.com



**H**er heyber bi dijberê xwe û her wate jî bi dijiwateya xwe tê zanîn û watedarkirin. Her çend ku

pexîlî wekî dexesî, hesûdî an çavnebarî bê dîtin an jî wekî zikreşiya kompleksa raserbûnê bête zanîn jî, bêşik mirov dikare wateya gellek hestên neçê û ramanên neyînî jî lê bar bike. Belê berevajî wê fedakarî, têborîna mirov a hemû berjewendiyên kesane ye. Her wiha fedakarî, têkoşîna mirov a li hemberî metirsî, xetereyî û zordariyên civakî ye. Ev yek bi xwe armanceke payeberz û pîroz e û gellek hest û bestên mirovî di xwe de dihewîne.

Bi kurtayî pexîlî, rîknê rikdariya navbera mirovan û jêderka şer û kîn û aloziyan e. Belê fedakarî, destpêka bidestxistina tevê nîrx û hêjahiyên mirovî û kilîda hemî rêz, rêzdarî û rûmetdariyan e. Fedakarî, di dilê mirov de hest û bestên mirovheziyê pêk tîne. Û her wiha gellek bizav û libatên nefsbîçûktiyê bi mirov re digihîne. Mirovên fedakar ne ji bo xwe ji bo gel û civakê dikevin nav liv û bizavên sûdewar û erênî. Û ew tucar bi pey mezinahî û navdariyê nakevin. Ne ew bi başî behsa xwe dikin û ne jî ji bo ku meriv bi başî behsa wan bike, fedekariyê dikin. Wekî ku "La Bruyer" jî dibêje: "Mirovên nefsbîçûk qet behsa xwe nakin"

Îro li ser rûyê erdê du feraset û nêzîktêdayinên dijber û lêkneker hene. Yek pexîlî, ya din jî fedakarî ye. Wekî ku li jor jî hate diyarkirin, hemû neyînî li ser binyata pexîliyê û erênî jî li ser a fedekariyê ava dibin. Jixwe, ewqa geremol û gengeşiyên ku li ser rûyê erdê rû didin hemû ji destê pexîlî çavbirçîtî, çavnebarî û ezperestiya mirov e. Belê pêşveçûn û şarezahiyên gerdûnî û xenîmeyên vê dinê hemû jî dîsa bi fedekariya mirov bi dest dikevin. Bi qasî ku li ser rûyê dinê mirovên pexîlî û xêrnexwaz hene, ew qasî jî yên xêrxwaz û fedakar hene û dê hebin jî. Îro têtikliyên navbera mirovan jî li ser vî hîmî hatine rûnandin. Her wiha pêwendiyên navbera şer û aştîyê jî li ser vî rîknî bilind dibin.

Ji do heta îro mirov di nav xwe de bûne du şeqan. Ên têr û yên birçî . Ên têr û bitir, di nava bezm û kêf û hingemeyê de digevizin û yên birçî jî di nav kambaxiya diljarî û xizaniyê de difetisin. Mirov dikare

bibêje, di heman serdemê de mirovên ku heman gerdûnê parve dikin, hin ji wan di bihuştê û hin ji wan jî di dojehê de dijîn. Li ser heman rûzemînê û di heman serdemê de hem bihuşt û hem jî dojeh hatiye avakirin. Îcar gelo pêkan e ku di navbera kesên dojehî û bihuştî de yeksanî, aştî, rêz û hurmet pêk were. Ev yek rasterê dibe sedema dexesî, pexîlî û çavnebariyê. Her wiha ev yek dibe jêderk û bingeha şer û pevçûnên lêkneker û jênager ên navbera civak û mirovan jî.

Mirovên ku heman erd û erdnîgariyê parve dikin, hin ji wan ji sibê heta êvarî xwêdana xwe paqij dikin û dixebitin, belê li nan û pîvazê dihesilin. Heta gellek caran li nanê zik diheyirin. Hin jê jî, her çend ku eniya wan xwêdan nade û avê di nava xwe de naçelqînin, belê her devekî wan tişteki dixwe û di kêfa belek de ne. Bi awayekî din mirov dikare bibêje, xwediyê kedê di nav xizan û birçîtiyê de dijîn, keslan û kedxurên dinê jî di nav bongî û bitiriyê de digevizin. Heta ku li quncikeke cîhanê mirovên têr û li quncika din jî yên birçî hebin, ne pêkan e ku aştî, azadî û mirovahî pêk were û mirov bi mirov şa bibe. Dîsa heta bêkarî, birçîtî, parsekî, hêjarî mişextî û penaberî ji ser rûyê erdê ranebe, ne gengaz e ku dexesî, hesûdî, rikdarî, çavnebarî û pexîliya nevbêra mirovan ji holê rabe. Lewre her mirov hêjayî xîret, hurmet û şeref û rûmetê ye. Ji bo wê mafê her mirovê/î heye ku bi awayekî yeksan, li gora pêdiviyên xwe ji vê xwezayê fêde û sûdê wergire û li ser rûyê vê erdê wekî serbixwe û azad bijî. Dibe ku ev yek wekî nêzîktêdayineke utopîk bê dîtin, belê bi rastî jî heta ku feraseteke wisa derbasî jiyane nebe, serê mirovahiyê ji karesat û belawatên dinê xelas nabe.

Jiyan û pirsgirêkên mirovahiyê dişibine ava çemekî serhildêr û mirovên qeraxa çem ên tirsonek û tirale ku yek ji yê din re nebêje "Heke hinek ji me ranebin xwe ji hinekan re nekin pira, dê emê heta dawiya temenê xwe li ber qeraxa vî çemî herin û bîn. Tu kes nayê me derbasî aliyê din nake."

Tu arîşe û kêşeyên dinê jixweber çareser nabin.

Jixwe ku mirov bîra vê yekê bibin, dê hemû pirsgirêkên mirovahiyê çareser bibin. Û dê "Gur û mî tev de biçêrin."

Kaniya Helbestan

## Li Rojhilat



Cegerxwîn

Şev reş û tarî, bahoze û bandev  
Nakevî dest me: ne razan ne rev  
Hewrên rêzanî tarî û giran  
Berfê bibarî, yan gulebaran ?  
Em reşhewravin kevnepereştî  
Tênin bîra min dîlî, bindestî  
Dar bikevî dest mirovên xwînwar  
Dîsa dimênin birçî û hejar  
Karê me dibî veşartin û rev  
Tavê nabênin bi rojê em tev  
Tênin ber çavan dijûn û lêdan  
Şemaq û qamçî, kawçûk û zindan  
Pêlên zordestî wek lehî û çêm  
Xwe berdî ser me xum-xum û lem-  
lem  
Di ber xwe dibin bîr û serbestî  
Paşve dişkênin nûjenpereştî  
Têncî perçiqandin tev destûr û rist  
Raserî me tîn ev kevnepirist  
Benda Azadî li xwe napirist  
Belkî ez şaşim, ji wan natirist  
Tarîx û abor, herdu di gel me  
Eger bitirsîn ji bo me şerme  
Badîhewane ev tav û bahoze  
Eger em rabin hemû dibin toz  
Vane, şiyarbûn cotkar û karker  
Dijmin têtşênin bê ceng û bê şer  
Çiqas bimênî ev cîhan bê deng  
Bê şer, bê kuştin, be halan û ceng  
Em her diçin pêş, dijmin diçin paş  
Bê av digerin ev dolab û aş  
Sermayepereşt, tev top tavêjin  
Nabênin îro çawan sergêjin ?!  
Ew çî talan û çî ceng û pevçûn  
Bila xweş bikin hemû cî û şûn  
Hemû em mirov bibin wek bîra  
Çî nedin dîza, rê nedin gura  
Çîhan xweş bikin tev bax û bihişt  
Ne şûr, ne xençer, ne derf û ne xişt  
Keser nemênî wek min dilbirîn  
Ev dinya xweşe, dinya Cigerxwîn

# Bajarê Cizîra Botan Bûka Mezopotamyayê Ye

**Konê Reş- Qamişlo, 25.09.2008**

**C**izîra Botan bajarekî gellekî kevnar e, mirovaniyê mora xwe li gellek perestgeh, mizgeft, keleh, qesir, pir, sûr, burc, û gellek avaniyên wê yên

cur bi cur xistiye. Gellek şaristanî têre derbas bûne û her şaristaniyekê bermayê xwe, şop û şûna xwe li bajarê Cizîrê hiştine. Bajarê Cizîra Botan ji kurdan re bajarekî pîroz e, ew jî mîna bajarê Qudsê( Orşelîm) ye. Ji ber ku hêjî ew bajarê Kurdî yê orjînal e; Kurdîtiya xwe parastiyê, zimanê kurdî di kolan û çarşiyên wê de tê axaftin û yê bazarê ye.

Jixwe wek ku tê zanîn, piştî tofana Nûh Pêxember mirov li herêma Botan; bajarê Şernex û Cizîrê bi cih bûne. Piştî de cihanê de belav bûne. Dibêjin dema keştiya Nûh pêxember li ser çiyayê Cûdî sekiniye, nav li çiyayê Cûdî hatiye kirin û gotine (Cî dî), ango keştiyê wî cihê ji xwe re dît. Di Qurana pîroz de jî hatiye: "**We estewet elel Cûdî**", ango keştiya Nûh Pêxember li ser çiyayê Cûdî sekiniye. Jixwe kurd dibêjin; di heyamê tofana Nûh de, dema keştiya wî bi ser çiyayê Şingalê re derabs bûye, li kûpê çiya ketiye û konek tede vebûye. Mar xwe kiriye gulofitek û ew kon girtiye, da ku av nekeve keştiya wê de û dibêjin ku kevokê bi nikilkê xwe şaxek ji dara zeytûnê, wek mizgînî ku nêzîkî bejayê dibin, ji çiyayê Cûdî ji Nûh pêxember re aniyê û ji wê hingê ve kevok û şaxikê zeytûnê bûne sembola aşitiyê. Hem jî dibêjin ku navê Nûh pêxember ji gotina (Nû) a kurdî hatiye, bi wateya nûbûnê. Ji ber ku dinya wê hingê ji nû ve hatiye avakirin. Dema ku Nûh û her heştê hevalên xwe, li ser çiyayê Cûdî ji keştiya xwe daketîne, wana di quntara çiyayê Cûdî de gundek bi navê Heştêyan ava kirine. Ew gund ta roja îro jî di pala çiyayê Cûdî de ye. Xuyaye ku di pey gundê Heştêyan re, bajarê Şernexê hatiye avakirin û jêre gotine Şarê Nûh ango bajarê Nûh an şarê Nû. Bi dirêjîya demê û pirrbûna mirovan re xelk ji herêma Botan derketine û li dinyayê belav bûne û weha kurdmanc li cihê xwe, herêma Botan mane û ji wan re hatiye gotin **Kurdmanc**, ango( Kurd Man li Cî).

Di baweriya min de bajarê Cizîra Botan ji kurdan re mîna bajarê Mekkê ye ji Ereban re. Zimanê wê jî ji kurdan re mîna zimanê Qureşiyîyan e ji ereban re. Ji kevin de û ta roja îro zimanê kurdî tekane zimanê axaftina xelkên wê ye. Zimanê danûstandin û bazirganiya wê ye. Di roja îro de bajarê herî dawîn e di nav kurmançaxêvan de, ku bi tenê zimanê wê kurdî ye û zimanê kurdî parastiyê û diparêze. Piştî ku serhildana Mîr Bedirxan di sala 1847'an de beravêti bûye, mîr û malbata xwe di sirgûnê de dûrî welatê Botan jiyana xwe derbas kirine û bi taybetî piştî damezirandina Komara Tirkîyê di sala 1923'an de, şerê ziman, dîrok û hebûna kurdan bi tundî hatiye kirin. Ango ji

161 salî ve xelkên Cizîrê li ber xwe didin.

Ji 95 salî ve, dagirkeran bi sedema ku zimanê kurdî nemîne, bi rêk û pêk şerê zimanê kurdî kirine. Zimanê kurdî wek sembola paşverûtiyê û nezaniyê destnîşan dikin. Dagirkeran ne tenê planên bişavtina çand û ziman li ser kurdan meşandine, lê belê wan xwestiyê ku kurdan di her warî de asîmîle bikin... Lê Botanî, di roja îro de şerm



dikin ku bi hev re bi tirkî biaxifin. Xuya ye ku Mîrên Botan jî, digel serhildan, nakokiyên xwebixweyî û têkçûnan, hişmendiyeke kurdewarî di herêma Botan de çandine. Her weha di bin desthilatiya wan de çandek kurdewarî hatiye afirandin û zimanê kurdî wek zimanekî şaristaniya pêşketî di nav çerx û dewranên salan de hatiye bikaranîn. Wêjeyek bi zimanê kurdî hatiye nivîsandin û weha gellek zanyar û rewşenbîr ji nav civaka Botan derketine. Nav û dengê gellek ji wan di cihanê de belav bûye. Armanca dagirkeran ne tenê bişavtina çand û zimanê kurdî bû, belê wan xwestiyê ku hişmendiya dîrokî jî, ya gelê Botan ji holê rakin... Li gor ku min dît û nas kir, dîroka mîrnişîna Mîrekên Botan a ku di herêmeke berfireh de, bi navê Mezopotamiya ku dor hezar salî dom kiriye, qet destûr nedaye û nade dagirkeran ku planên xwe bi rehetî derbas bikin, her dem û gav bûne kelem û asteng li pêşîya projeyên wan. Ji ber ku xelkên Cizîrê, di

demeke dirêj de, ji hêla **mîrekên Azîzan** ve, bi hezkirina ziman û welatê xwe hatine perwerdekirin. Lê sed heyf û mixabinî ku nezaniya me jî bûye afîkarî ji dagirkeran re, ku pêmayên me yên dîrokî li ser piyan nemînin...! Burca Belek û gellek şûnewarên dîrokî yên din wêran bûne. Ji bilî wan, gellek cihên dîrokî hene, ku şop û şûna wan nema xuya dikin. Dagirkeran jî gellek cihên dîrokî wêran kirine, hin jî di bin ava Dicle de mane. Gellek cih jî di bin erdê de nebedî ne, xebat û xepartin ji wan pêwîst e.

Tevî ku roja îro 84 mizgeft li bajarê Cizîra Botan hene û dewleta tirkî mehiya 84 Melayan dide, lê min ew bandora olperestiya îslamê a zêde lê nedît..

Erê! Bajarê Cizîra Botan; keleha berxwedana azadî û zimanê kurdî ye, navendek ji navendên olên dinyayê ye, landika şaristaniya mirovahiyê ye, Heca kurda û bûka Mezopotamiya ye.

Taybet bo rojnameya AGIRÎ ye

## Çend Stêrên Geş Di Esmanê Helbesta Nû Ya Kurdî De

► Pirtûka nû ya nivîskarê Kurd **Xelîl Duhokî** bi navê "çend stêrên geş di esmanê helbesta nû ya kurdî de" çap û belav bû. Pirtûka han ji weşanên Yekîtiya Nivîskarên Kurd Taya Duhokê ye û ji 325 rûpelan pêk tê.

Nivîskar di vê pirtûkê de nixandina kar û wergera berhemên helbestvanan û herwiha danasîna helbestvanên Kurd bi giştî di hemû Kurdistanê de kiriye armanca xwe û bi vê çendê xebat û xizmetek berbiçav bi tore û edebiyata Kurdî kiriye. Hebek ji vê pirtûkê ji bo pirtûkxaneyê Agirî re hatiye pêşkêşkirin.

Em tevî destxweşî û mandînebûnî û pîrozbahî ji birêz Xelîl Duhokî, herwiha hêviya berdehamî û serkevtinê di hemû kar û xebatên wî, bi taybet xizmet bi wêje û edebiyata Kurdî de jêre dixwazin.





## Dengê Rojava

Bê navnîşan: Şîlan Hemo..

## Helbestvana Ku Bi Dilê Xwe Dibîne!

Besam Mistefa



**E**z napirsim ew aniha çi dike:  
Tûrik li mil e  
Êş li ser piştê bar in

## Kolan bi kolan

Ew li xwe digere niha.

"Bê navnîşan" yekemîn diwana helbestan a helbestvana Kurd Şîlan Hemo\* ye ku bi zimanê erebî derdikeve. "Bê navnîşan" di nav rûpelên xwe de gellek helbest û deqên ku bi berçavka hundirîn ya Şîlanê hatine wênegirtin, vedihewîne. Ev wênayên ku hema hema û bê nav û bê nîşan çawa ku dilê wê jê re gotiye hatine girtin. Ew komek têkçûn û bîranîn û yadigarî û azwer in ku mîna kertên vexwendinê-bi bihna narinc û yasemînan xemilandî- helbestvan wan dişîne da ku xwendevan beşdariya wê bike di xemgîniya wê ya rojane de, da ku pêre rahêje hinek êş û xemên wê yê bê dawî pêre parve bike. Bi giştî, helbestên wê kurt in wekî çirûskan xwe li nav dîwarên hiş û bédengiya me didin û hewil didin ku bêrikirina wê ya şikestî û melûliya wê ya bihêz bigihînin me.

Di destpêka pirtûkê de ya bi sernavê"

Ev

**helbestvan bejina xwe bilind dinivîse û li derî dixê**" helbestvanê bi nav û deng Îbrahîm Ûsiv dinivîse û dibêje: "Pirtûk ji çend deqên kurt pêk tê ku bi berçavka dil hatine kişandin, û Şîlanê ew ji nû ve forme kirine, heta jê hatiye bi kurtî hizra xwe komî serhev kiriye û bi gotinin kêr pêşkêşî me kiriye".

Şîlan helbestvana bêserûber ya çil û yek êşî, ya xemgîna kêfbexş, ya azwera serkeftiya têkçûyî, bi perên vê koma helbestên xwe re-eva bê nav û bê nîşan-avakirina kişwera xwe ya li ser qûmê berdewam dike. Riya dirêj daye ber xwe û her tède dikeve meş û tevgerê de. Carina dikeve, carina hêza wê namîne, carina tî û carina birçî dibe, lê her meşa xwe didomîne û ranaweste, tu qey dibêjî hêzeke nediyar yan jî cadûgeriyekê ew di nav pencên xwe de rapêçaye û her wê dehf dide...berbi pêş de.

Şîlan li ser xewnên xwe yê sade-veke dilê wê- dijî. Li hêlînên dilê xweyî piçûkî belawela digere, wek ku xewnên di nava wê de şerê hevûdu dikin û serê hevûdu dixwin û tiştê ji ber wan dimîne tenê alên împêratoriyet û dewletên kevinare ne.

Li ser evîneke ne wek ya em wê nas

dikin, Şîlan dinivîse. Her kes li ser yara û yarê xwe digirî, tenê Şîlan-wek ku qedera wê eynî wisa be-li ser "Mem û Zîn" û "Ferhad û Şêrîn" û yê dinê ji lehengên efşane û dastanên kurdî evên ku bi çolan û biyabanan ketin û negihana ti navnîşanan û li vir û wira mirin bêyî ku bigihîjin hezkiirî û yarikên xwe, lê belê çîrok û dastanên wan ji nifşekî gihane nifşekî dinê, û ji dilekî gihane dilekî dinê û çiyên xwe di her maleke kurdî ya dagirtî bi êş û xerîbî û koçbariyan de girtin, Şîlan li ser wan digirî û dinivîsîne.

Bi wan re, Şîlan biyaban bi biyaban li buhara dilê xweyî miçiqî digere, lê belê rastî tu avsarane nehatiye ku tîna dilê xwe bişkîne. Wê pîr bang kir, pîr qîriya û axivî heta ku dengê wê bê deng ma. Lê, axaftinê tiştê nekîr, û barê westanê da ser milê wê, tu qey dibêjî ew hatiye afirandin da ku biweste û mîna xewnperesteke dawî xwe bi alên rengîn û tozgirtî veşêre! Temen û sal û roj û meh çûn lê bihar nehat, hema ku hat jî wê ne di dema xwe de, gêj û bêmad were:

**Bi şîrîka bariyam****Payîza min şîn hat****Buhara min ne di dema xwe de hat****Şanoya xeman bidawî hat!**

Di quncikeka dilê wê-yê perçiqî- çiyek bi firehiya asîman ji êş û kulên gel û welatê wê re heye. Helebçe bê ku destûrê bixwaze derbasî mala helbesta wê dibe, dergeh hemû ji Helebçeyê re vekirî ne, dilê xwedîya malê jî ne xerîba xem û bêzariyê ye: dilê şikestî û birîndar e. Helebçe xencereke tûj e di navtenga dîrok û mirovatiyê de, ya xak û mirov de. Şîlan a dişewat weku dilê dayikan li ser her kevirê di Helebçeyê de digirî, li ser her darekê, li ser her zarokekê ku mir, xeniqî li ser sînga diya xwe, li ser her dayikeke xeniqî li ser sînga mêrê xwe, li ser her mêrekî xeniqî li ser sînga kevir! Lê, piştî ku ew hêsrên xwe paqij dike, bang dike Helebçeya giyan:

**Here zaroka sedsala bîstan****Tar te distrênin û****Helbestvan te dibêjin.**

Şîlan qet naraze. Eger raze jî, dikê wê hişyar dimîne li ser riyên bi mij û dûman digere. Mîna narincekê, ew bi bihna xwe êvara xemgîn dadigire. Ewa li ser milê wê ne çenteya wê ye, lê mal û welatê wê ye. Ji xwe Şîlan mal û welat nîne wek ku carina hizr dike û gellek caran ji hizra xwe bawer dike...gellek nav-bi piranî mêyane-mîna çirîsîna stêrkan di nav

asîmanê helbestên wê de derbas dibin û nîşana bîranînekê, bajarekî, xewnekê bibîr tînin, lê di nav barîna van nawan de, bê hemdî xwe ew navekî tenê jibîr dike, navê xwe jibîr dike, tenê navê xwe. Her çawa be jî, dilê wê mişt jiyane. Jiyana ku dişibê wê û kurdên wê û bajarên wê û gundên wê û heriya gundên wê û heriya xewnên wê. Çend bîranînen rengfirîn wekî rûyê wê yê rengfirîn, wekî bajarên wê û temenê wê yê rengfirîn xwe di gergerînoka mejiyê wê de hiştine, nemaze dema ew xwe dispêre biyabana temenê xwe ya bê serûbin, stêrkin ji evînek-eger rast be em wa bêjin!- evîneke ne xuyayî tevî hertişî digirisin:

**Çû...****Du çixareyên sotayî****Li paş xwe hiştin û****Çû!**

Şîlanê bê ku hay ji xwe hebe riyên kaniyên ku dil av didin wenda kirin. Hîn ji xewna şîr venekirî, rastî tiştêkî bi navê kîn û zikreşiyê tê. Ji demsalan, payîzê ji xwe re hildibijêre yan jî payîzê wê hildibijêre. Bi Ullîs re dikeve nava şer û qirênê de. Sîzêf ji xwe re dost dibîne. Dîsa, gotinên wê aramiyê dixin dilê me de, wekî çîrokên dapîran di şevên zivistana yê dirêj de û dengê bahoz û bagerên li derve ji me dûr dixîne. Ew hewil dide bihna êvarê-û qehwe û strana bi me bide nasîn, lê ev hemû riya xwe wenda dikin weke xwedîya xwe û mîna dûyekî dûr di asîmanekî dûr de dibine hilm, diçin. Tenê westan û bihna rojan û axaftina bê dawî digihîje me, lê Şîlan dimîne:

**Heta êvarê****Hîn jî perdên wê berdayî ne  
Li pişt pencereya wê ya piçûk  
Çivîk li ser darên sindiyanan  
Dilorînin.****\*Şîlan Hemo:**

-Di sala 1967-an de li Qamişlo ji dayik bûye.

-Xwendina xwe ya seretayî û navendî û lîse li Qamişlo xilas kiriye.

-Înstîtûta amadekirina mamostayan li Qamişlo qedandiye.

-Di gellek malperên kurdî de dinivîse wekî: Efrîn, Semakurd-Tîrêj bi herdû zimanên kurdî û erebî.

-Di gellek kovarên kurdî li Sûriyê nivîsandiyê wekî: Zanîn-Hîwar-Mewasim.

-Di kovara "Asoyên perwerdeyê" de gotarên der barê pirsgerêkên zarokan de dinivîse.

## Rejîma Îranê Hevkarîya Xelkê Lêmiştêdayî Yê Makûyê Nake

► Ajansa "irankhabar"ê da zanîn ku seba hevkarînekirina rejîma Komara Îslamî a Îranê tevî xelkê lehîlêdayî yê Makûyê di meha Tebaxa îsal de, çend rojan berî niha nêzîkî 5 hezar kes ji xelkê vî bajarî ku di encama lêmiştê de tûşî zirar û



ziyaneke zaf hatibûn, li hember binkeya Femandariya bajarê Makûyê kom bûn û nerazîbûna xwe di vê derbarê de diyar kirin.

Hêjayî gotinê ye ku di encama lêmiştê îsal de, xelkê Makûyê tûşî zirar û ziyaneke zaf a aborî û canî hatine, lê bersivekî rejîmê heya niha tu hevkarîyek bi xelkê lêmiştêdayî re nekiriye.

## Îran Otombîla Jinane Çê Dike

► Rojnameya "The Guardian" a Bîrîtaniyayê di hejmara roja sêşem 07.10.2008'an, raporek li dor biryara karxaneyê otombîlê ya herî mezin a Îranê (Iran Khodro) belav kir ku amadekariyan ji bo çêkirina otombîleke jinane dike. Bi vê



planê dixwazin hessasiyeta zayendî ku Îran rastî qonaxêke nû kiriye, kêr bikin. Ew cura otombîlê ku tê çêkirin tenê û taybet ji bo jinane dibe û li gor dilê wan û normên taybet ên jinane dê were çêkirin!

Fikra çêkirina vî otombîlê li ser bingeha cudahîdanên zayendî ên ku rayedarên Komara Îslamî piştgiriya jê dikin, derketiye holê.

Rejîma Îslamî li Îranê dixwaze ku di her wareke civakê de jinane û mêran li hev cuda bike û di çend salên borî de dehan gelale û projeyên wisa hatine berbas û piştê birêve çûne.

## Enflasyona Îranê Di Rojhilata Navîn De Pileya Yekem Heye

► Sindoqa Navneteweyî a Dirav di rapora xwe a herî nû de ragihand ku Îranê rêjeya herî bilind a awsan(enflasyon)a aborî di nav 14 welatên Rojhilata Navîn de heye.

Ajansa Nûçegihaniya Xwendekarên Îranê (ISNA) da zanîn ku qasê enflasyonê li Îranê



26 ji sedê hatiye îlankirin ku li gor vê yekê, di nava 183 welatên cîhanê de, pileya çarem a awsan aborî heye. Sindoqa Navneteweyî a Pere di rapora xwe de pêşdîtina vî yekê kiriye ku rêjeya enflasyona aborî a Îranê di sala 1387(2008-2009) de radeya herî bilind dê hebe û heta

## Xelatên Nobelê Yên 2008'an

► Her sal di vê demê de Xelatên Nobelê tîn pêşkêşkirin. Xelatên Nobelê ên sala 2008'an hatin dayîn.

**Xelata Nobelê ya Aştiyê** îsal bi Serok Komarê berê yê Finlandayê "**Martti Ahtisaari**" hate dayîn. Ji bo vê xelatê îsal 197 berendam hebûn ku aqibet ber "**Martti Ahtisaari**" ket. Xelata Nobelê ya Aştiyê 1,4 milyon dolar dirav e.



**Xelata Nobelê ya Wêjeyê** a îsal jî dan nivîskarê Fransî "**Jean-Marie Gustave Le Clezio**".

**Xelata Nobelê ya Kîmyayê** jî îsal ji 3 kesan re hate dan. Zanyarên Amerîkî "**Roger Tsien**", "**Martin Chalfie**" û zanyarê Japonî "**Osamu Shimomura**" ew xelat wergirtin.

**Xelata Nobelê ya Fizîkê** jî ji 3 kesan re hate dayîn. Zanyarên Japonî "**Makoto Kobayashi**" û "**Toshihide Kaskawa**" û zanyarê Amerîkî "**Yoichiro Nambu**" Xelatgirên Nobelê yê Fizîkê bûn. Xelatgirên **Xelata Nobelê ya Tibê** jî diyar bûn. Ev xelate dan kesên ku Vîrûsa kansera rehîma Jinan û "HIV"ê dîtibûn. Akademiya Swêdê Xelata Nobelê a Tibê a îsal dan her du zanyarên Fransî "**Franchoise Barre-Sinoussi**" û "**Luc Montagnier**" ku van her duyan vîrûsa nexweşiya "HIV"ê dîtine ku nesaxiyeke gellek xeter e. Digel van her duyan her wiha Xelata Nobelê ya Tibê a 2008'an dan zanyarê Almanî "**Harald Zur Hasusen**" ku Vîrûsa kansera rehîma Jinan dîtîye.

## Balafirên Turkiyê Bi Giranî Herêma Kurdistanê Bombebaran Kirin

► Rojên 12 û 13'ê Çiriya Pêşîn a 2008'an, balafirên şerî ên Arteşa Turkiyê hin gundên ser bi qezaya Amêdî ên girêdayî parêzgeha Duhokê bi giranî bombebaran kirin. Êrîş bo ser navçeyên Nihêl,



Berwarî, Nêrwe, Rêkan û Avaşîn ên Amêdiyê hatiye kirin.

"PUK media"yê eşkere kir ku eva çend roj dibe balafirên şerî ên Arteşa Turk berdeham esmanê Kurdistanê dibezînin. Vê çavkaniyê da zanîn hin gund bi diwarî hatine bombebaran kirin.

Çavkaniya han eşkere kir ku tevî bombebarana balafirên, topxaneyên Arteşa Turk jî heman dever topbaran kirine. Heya niha tu agahiyên fermî li ser ziyarên canî û madî ên van êrîşan nehatine ragihandin.

dawiya sala 1392(2012)'an, dê bigihîje rêjeya herî zaf ya xwe. Di nava welatên herêma Rojhilata Navîn de, Îran bi 26 ji sedê a awsan aborî yekem e, Yemen bi enflasyona kêmtirî 17,2 ji sedê di pileya duyem de ye û awsan herî kêr a vî navçeyê a Behreynê ye ku nirxa wê 4,5 ji sedê ye.